

# KESEMUA VENUE SUKMA KE-18 SUDAH SEDIA

14 JULAI 2016  
Sinar Harian  
*Sukma 2016*

KUCHING - Kesemua 23 venue sudah sedia untuk menjadi gelanggang bagi 24 jenis sukan pada Sukan Malaysia (Sukma) ke-18 di sini, bermula 22 Julai ini.

Ia termasuk lapang sasaran menembak yang baharu bernilai RM18 juta di Kompleks Sukan Sarawak.

Setiausaha Tetap Kementerian Belia, Sukan dan Solidariti Sarawak, Kameri Affandi berkata sistem teknikal yang akan digunakan di lapang sasaran menembak itu juga telah dipasang hari ini.

"Sistem berkenaan dari Jerman, maka ia mengambil sedikit masa untuk sampai dan dipasang di negeri ini.

"Bagi beberapa sukan seperti skuasy, bola jaring, akuatik dan boling padang, kemudahan baharu yang dibina adalah antara yang terbaik di negara ini," katanya.

Justeru, kami menjangkakan atlet dapat menampilkan prestasi pada tahap tertinggi, katanya kepada media selepas pertandingan ujian kedua temasya itu di Pusat Akuatik Sarawak, di sini hari ini.

Kameri berkata, kira-kira 6,000 atlet dan pegawai dari seluruh negara dan Brunei akan tiba di Sarawak bermula 18 Julai ini, dan Perkampungan Sukan di Universiti Malaysia Sarawak (Unimas) juga sudah sedia menempatkan mereka.

Pengerusi Jawatankuasa Penganjur Sukma ke-18, Tan Sri Mohamad Morshidi Abdul Ghani sebelum ini, berkata kerajaan negeri membelanjakan kira-kira RM400 juta untuk menaik taraf venue sedia ada serta membina kemudahan sukan baharu.

Menurutnya, tambahan RM50 juta diperuntukkan bagi kos operasi dan penganjuran temasya sukan berkenaan.

Morshidi berkata sebagai tuan rumah, Sarawak akan menyenaraikan 548 peserta, yang terbesar untuk temasya sukan itu, diikuti Selangor dan Perak.

Kebanyakan acara sukan akan berlangsung di Kuching dan Kota Samarahan, manakala Sibu akan menjadi gelanggang acara badminton dan bola tampar, sementara Miri menjadi venue acara karate dan pelayaran.

Yang Dipertua Negeri Sarawak Tun Abdul Taib Mahmud dijangka merasmikan pembukaan temasya sukan itu di Stadium Sarawak pada 23 Julai, manakala Perdana Menteri Datuk Seri Najib Tun Razak akan menyempurnakan majlis penutup pada 31 Julai. - Bernama